

Greenland Airports International A/S-imi aktiaatit tamakkerlugit pissarsiarinissaat siunertaralugu, Naalakkersuisut naalagaaffiup oqartussaasuinnut saaffiginninnissamik peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq, Pele Broberg, Naleraq)

Akissuteqaat

(Naalakkersuisut Siulittaasuat)

Siullermeerneqarnera

Naalakkersuisut aalajangiiffigisassatut siunnersuummut saqqummiunneqartumut qujapput, taanna attaveqaatigut piginneqatigiissutitta ilaat pillugu pingaarutilimmik eqqartuinissamik qaqlerivoq.

Naalakkersuisut tunngaviatigut attaveqaatersuutit pingaaruteqavissut Kalaallit Nunaannit aqutsivigineqarnissaat isumaqatigaat. Nunap nammineersinnaassusianik nunatsinnilu attaveqaatersuutininik pilersaarusiornikkut inerisaanissaq siunissaq ungasinnerusoq eqqarsaatigalugu anguniagaapput. Attaveqaatersuutit siusinnerusukkut ilaannakortumik namminersortunngorsarneqarsimasut ukiut kingulliit ingerlaneranni nunani arlalinni arlalinni utertillugit pisiarineqartalersimapput. Naalakkersuisuniilli aamma erseqqissaatigineqassaaq, uagut attaveqaatersuutivut pingaaruteqarlunnartut nammineq pigivagut, tassa Greenland Airports A/S 100%-imik kalaallinit pigineqarmat. Ingerlatseqatigiiffiulli pigisaa Greenland Airports International A/S taamaallaat danskit naalagaaffianit ikinnerussuteqartumik piginneqataaffigineqarpoq. Taamaattumik Naalakkersuisut pigisagut tamakkiisumik aqutsivigaat taamaallinnilu mittarfinnik ingerlatsineq ilaalluni.

Greenland Airports International A/S-ip 67%-ia ullumikkut Naalakkersuisunit pigineqarpoq, tamanna ima isumaqarpoq ingerlatseqatigiiffiup pigisaanut piginnittuunerup annerpaartaa pigereeripput. Piginnittuunerup 33 %-ia Danmarkip naalagaaffianit pigineqarpoq, Nuummi Ilulissanilu timmisartoqarfiliornernut annertuumik aningaasaliissuteqarfisimallugit. Danmarkimik suleqateqarneq suliat taakku piviusunngortinneqarnerannut aalajangiisuulluinnarnikuvoq, aningaasaliissuteqarneq ingerlatsinermullu tapiissuteqarneq aqqutigalugit.

Greenland Airports, Mittarfeqarfiit A/S-p aamma Danmarkip naalagaaffiata piginnittuunerumut isumaqatigiissutaat aalajangersakkamik imaqarpoq, (§13.5), tassani periarfissamik ammaasoqarluni Naalakkersuisut tatiginnillutik naalagaaffiup aktietaasa pissarsiarineqarnissanut neqerooruteqarsinnaallutik. Naalakkersuisut periarfissaq tamanna ilisimaaraat, akuersaarlugulu siunissami isumaqatigiinniartoqassappat taamatut aalajangersagaqarmat.

Taamaattorli pingaaruteqarpoq erseqqissassallugu taamatut tigusiarneq namminerisamik aningaasartuutaanngitsoorsinnaanngimmat. Aktiaatit nalingat nalilersorneqartussaavoq, tiguisoqassappallu tigusinissamut atatillugu isumaqatigiinniartoqassalluni aningaasaliisoqarlunilu. Taamaammat isummertoqareersinnaanngilaq, aningaasaqarnikkut kinguneqaateqanngitsumik isumaqatigiittoqarsinnaasoq. Tamatuma saniatigut ilanngullugit naatsorsuutigineqassapput, siunnersortimut aningaasartuutit kiisalu piffissaq suliffiusoq allamut atorneqarsinnaagaluartoq.

Naalakkersuisut isumaqarput, danskit piginneqataassutaannik maannakkorpiaq tigusiarneq aningaasaqarniarnikkut illersoruminaatsuusoq. Nunatta karsiani pissutsit imaapput, amerlanerusunik aningaasaliinerit pingaarnersioqqissaarneqartariaqarput aamma maannakkorpiaq pisariaqartut tatisisut a sammineqarnissamik nikissanillu pisariaqartitsisut atuupput.

Naalakkersuisut danskit naalagaaffiannik isumatusaartumik patajaattumillu suleqateqarneq pingaartitaraat. Tamanna attaveqaatersuutunik piginnittuunermut ingerlatsinermullu aamma atuuppoq. Maannakkut piginneqatigiinnerup ilanngullugu qulakkeerpaa, attaveqaatersuutitsinnik piusunik inerisaanissamut periarfissaqarnerput, siunissaq ungasinnersoq isigalugu innuttaasunut inuussutissarsiortunullu iluaqutaasussat

Naalakkersuisut soorunami piffissaq ungasinnerusoq eqqarsaatigalugu attaveqaasersuutitsinnik pingaaruteqarluinnartunik kisimiilluta piginnittuulernissarput anguniagarivaat. Kisiannili tamanna piffissami aningaasatigut attanneqarsinnaasumi eqqarsaatigilluakkamillu ingerlasoqalernerani pisariaqarpoq. Taamaattumik Naalakkersuisut kissaatigaat uuma inatsisartunut aalajangiiffissatut siunnersuutip isikkumisut isikkoqarluni itigartinneqarnissaa.

Taamaattumik Naalakkersuisut allannguutissatut siunnersuuteqarusupput:

"Greenland Airports International A/S-mi naalagaaffiup piginneqataassutaannik tigusiarni suleriaaseq suna atorneqassanersoq aamma qanoq akeqassanersoq Naalakkersuisut misissussagaat Naalakkersuisut Peqquneqarput, misissuinerlu piareerpat inatsisartunut ilisimatitsissutitut saqqummiunneqassalluni."